

南無華嚴會上佛菩薩（三稱）

大方廣佛華嚴經入不思議解脫境界普賢行願品卷第十一

爾時，善財童子於居士所，聞此甚深解脫門已，思惟修習決定無間。浮彼福德海，淨彼福德田，趣彼福德津，仰彼福德山，開彼福德藏，轉彼福德輪，觀彼福德法，植彼福德因，生彼福德力，增彼福德勢，長彼福德心，悟彼福德門。漸次行詣師子宮城，周徧推求寶髻長者。見在市中，遽即頂禮。繞無數帀，合掌前立，白言：「聖者！我已先發阿耨多羅三藐三菩提心，而未知菩薩云何學菩薩行，云何修菩薩道。善哉！聖者！願為我說諸菩薩道，我乘此道趣一切智。」

爾時長者，執善財手，將詣其家，示其所居，告善財言：「善男子！汝且觀我所居舍宅。」

爾時，善財即徧觀察，見其舍宅，廣博嚴麗，於其四面，各開二門，閻浮檀金之所合成。白銀為牆，周帀圍繞；玻瓈為殿，雜寶莊嚴；紺琉璃寶以為樓閣；碑磔妙寶而為其柱；堦墀軒檻，戶牖牕闥，靡不咸以眾寶所成，百千種寶莊嚴校飾；碼碯寶池，香水盈滿；四面欄楯，絡以真珠；雜寶樹林，周徧行列。赤珠摩尼為師子座，阿僧祇寶，間錯莊嚴；毗盧遮那摩尼寶王以為其帳。於其座前左右，建立光燄熾盛摩尼寶幢。雜色光明如意珠王而為其網，以覆其上。於其宅內，有大樓閣，高十層級，層開八門。

善財入已，次第觀察。見最下層，施以種種上味飲食。見第二層施諸寶衣，及眾財物。見第三層普施一切寶莊嚴具。見第四層，施諸采女，言辭善巧，隨意眷屬，并所受用上妙珍寶。見第五層，五地菩薩雲集其中，為安眾生演說妙法。諸所施為，無非利樂成就如來最勝論者，陀羅尼門，諸三昧海，及諸世間種種明智光明印行。見第六層，有諸菩薩，皆已成就甚深智慧，了達法性得大總持，三明六通皆悉具足，入普藏門，出障礙境，住不二法，現佛威儀。於不可說妙莊嚴海道場眾中，而共集會。各以異名，分別顯示般若波羅蜜門。所謂：寂靜藏般若波羅蜜門，善巧分別諸眾生智般若波羅蜜門，不可動轉般若波羅蜜門，離欲光明般若波羅蜜門，不可降伏藏般若波羅蜜門，照眾生輪般若波羅蜜門，隨順教網般若波羅蜜門，功德海藏般若波羅蜜門，普眼捨得般若波羅蜜門，入無盡藏隨順修行般若波羅蜜門，入一切世間無盡方便海般若波羅蜜門，入隨諸世間一切教海般若波羅蜜門，無礙辯才般若波羅蜜門，隨順眾生普照無礙般若波羅蜜門，離垢光明般若波羅蜜門，常觀宿緣而布法雲般若波羅蜜門。說如是等百萬阿僧祇般若波羅蜜門，徧不可說道場眾會，顯示莊嚴甚深智慧。見第七層，得如響忍。諸菩薩等，充滿其中，以方便智，分別演說諸出離門，悉能聞持一切如來所說正法。見第八層，得不退轉神通智力。無量菩薩共集其中，以微細智，觀諸世間。知諸佛剎道場眾會，如幻如燄，如影如

像，無有實性。見諸如來，無分別境，現一切佛，普徧色身，能以一音徧十方界，其身普詣一切道場。盡於法界，靡不周徧，普入佛境，普見佛身，普能受持一切佛法，普於一切佛眾會中，而為上首，演說法要。見第九層，一生所繫諸菩薩眾，於中集會。見第十層，一切如來充滿其中。從初發心，修菩薩行，超生死輪，成大願海，具勝神通，得勝自在，以勝威力，淨佛國土，殊勝莊嚴。普現十方道場眾會，演說正法，乃至示滅，盡未來際，調伏利益，化度眾生。如是一切悉使明見。

爾時善財，見如是等奇特事已，白言：「聖者！昔於何處，種何善根，獲如是等殊勝果報，致此一切清淨眾會。」

長者告言：「善男子！我念往昔，過佛剎極微塵數劫，有世界，名：種種色莊嚴輪。佛號：無邊光圓滿法界普莊嚴王，如來、應供、正徧知、明行足、善逝、世間解、無上士、調御丈夫、天人師、佛、世尊，與百千億聲聞眾俱，智毗盧遮那而為上首。復與百千億菩薩眾俱，智日威德光而為上首。時彼國王，名：法自在，佛受王請，入摩尼幢莊嚴園中，我於衢路，奏妙樂音，燒一丸香而以供養。由彼如來，與諸菩薩及聲聞眾，受我供故，令此香煙，起大香雲，普徧虛空而為蔭蓋，於閻浮提，七日七夜，普雨種種無邊眾色，眾生身相，微妙香雲。又令樂音，出生種種美妙音聲，普徧虛空，

演出如來不可思議三世無礙廣大智聚。令其聞者除滅一切煩惱垢障；增長一切真實善根；速疾圓滿一切智智；普能發起種種神通。我時以此供養善根迴向三處：一願永離貧窮困苦；二願常見諸佛菩薩；三願恆聞諸佛正法。由是因緣，故獲斯報。

善男子！我唯知此菩薩無障礙願，普徧莊嚴福德藏解脫門。如諸菩薩摩訶薩，得不思議功德寶藏，出不思議無量功德，入無分別如來身海，蔭無分別無上法雲，修無分別功德助道，起無分別普賢行網，證無分別三昧境界，等無分別菩薩善根，住無分別如來所住，見無分別三世平等。於一切劫不生疲厭，住不可壞普眼境界自在之地。而我云何能知、能說彼功德行？善男子！南方有國，名曰：藤根，其國有城，名：普徧門，中有長者，名為：普眼。汝詣彼問，菩薩云何學菩薩行，修菩薩道。」時，善財童子頂禮其足，繞無數帀，殷勤瞻仰，辭退而去。

爾時，善財童子，於寶髻長者所，聞此解脫已，深入諸佛無量知見，安住菩薩無量勝行，了達菩薩無量方便，希求菩薩無量法門，清淨菩薩無量信解，明利菩薩無量諸根，成就菩薩無量欲樂，通達菩薩無量行門，增長菩薩無量願力，建立菩薩無邊勝幢，發起菩薩無邊智慧，證得菩薩無邊法光，普入菩薩無邊大會。於菩薩法，決定無疑，趣求菩薩清淨解脫

，住菩薩心，深信愛樂，隨順作意。漸次前行，至藤根國，處處尋訪彼城所在。雖歷艱難，不憚勞苦，身無疲倦，心無厭退；但唯正念善知識教，願常親近，承事供養，徧策諸根，離眾放逸，於善知識，心恆愛樂。然後乃到普徧門城，百千聚落，周帀圍繞，其城廣大，種種莊嚴。雉堞崇峻，衢路寬平，市列百工，貨多珍異，往來委輸，人物可觀。

爾時善財，於彼城內，推求尋覓長者所居。人咸報言：「住市肆中，鬻香藥處。」聞已往詣，見其處在香臺座上，即前禮足，合掌而立。白言：「聖者！我已先發阿耨多羅三藐三菩提心，而未知菩薩云何學菩薩行，修菩薩道？」

長者告言：「善哉！善哉！善男子！汝已能發阿耨多羅三藐三菩提心。善男子！我昔曾於文殊師利童子所，修學了知病起根本，殊妙醫方，諸香要法，因此了知一切眾生種種病緣，悉能救療。所謂：風黃痰熱，鬼魅蠱毒，乃至水火之所傷害；如是一切內外諸疾，品類無邊，我悉能於一念之中，以種種方藥，如法療治，咸令除差，施其安樂。如是法門，汝應修學。」

善財復言：「聖者！我問菩薩所修妙行，云何說此世俗醫方？」長者告言：「善男子！菩薩初學修菩提時，當知病為最大障礙。若諸眾生，身有疾病，心則不安，豈能修習諸波羅

蜜？是故菩薩修菩提時，先應療治身所有疾。菩薩復觀一切世界所有眾生，營辦事業，受於欲樂，乃至出家，精勤修習，得聖道果，皆因國王，王之理化，要因無病。何以故？以諸人王，是諸眾生安樂本故。菩薩起化，先療國王，次治眾生，令無患苦，然後說法，調伏其心。

善男子！菩薩若欲治諸病者，先當審觀諸病因起，品類、增損，無量無邊，我今為汝說其少分。善男子！一切眾生，因四大種，和合為身，從四大身，能生四病。所謂：身病、心病、客病，及俱有病。言身病者，風黃痰熱，而為其主；言心病者，顛狂心亂而為其主；言客病者，刀杖所傷，動作過勞，以為其主；俱有病者，飢渴寒熱，苦樂憂喜，而為其主。其餘品類，展轉相因，能令眾生，受身心苦。

善男子！如是眾病，貧賤人少，多勞役故；富貴人多，過優樂故。善男子！一切眾生皆以無量極微大種，聚集成身，猶如大海，眾微水滴。如是人身，毛及毛孔，各三俱胝，三俱胝蟲，之所依住。以是諦觀，皮膚穿漏，兩眼睛肉，手足掌中，脂膏集處，毛蟲不生；其餘身分，間無空闕。

善男子！又觀此身，唯五大性。何等為五？所謂：堅、濕、煖、動及虛空性。所言堅者，所謂：身骨三百六十，及諸堅礙，皆地大性；凡諸濕潤，皆水大性；一切煖觸，皆火大性

；所有動搖，皆風大性；凡諸竅隙，皆空大性。然彼四大，皆多極微，於虛空中，互相依住，極微自性，微細難知，除佛菩薩，餘無能見。

善男子！如是五大和合成身，如世倉籩，終歸敗散。如是身器，由業所持，非自在天之所能作；亦非自性，及時方等。譬如陶師，埴埴成器，內盛臭穢，彩畫嚴飾，誑惑愚夫。又如四蛇置之一篋，如是四大，和合為身。一大不調，百一病起。是故智者，應觀此身，如養毒蛇，如持坏器。

善男子！汝復應知，內身、外器，皆四大成。從始至終，五時流變。云何外器五時流變？謂：盡虛空十方世界，眾生所感，妄業所持。劫初成時，人壽無量，自然化生，無我、我所；次食、段食，貪等現行；次由我所，共立田主，以為統御；次壽漸減，乃至十年。由惡業故，起小三災，至第五時，世界將壞。火災既起，梵世皆空，水災、風災，相續亦爾。善男子！是名外器五時流變。云何內身五時流變？謂：嬰孩位，心無分別，如劫初時，人無我所；次童幼位，能辨是非，如第二時，立自他別；次壯年位，縱貪瞋癡，如第三時，共立田主；次衰老位，眾病所侵，如第四時，壽等損減；次至死位，身壞命終，如第五時，世界壞滅。是名內身五時流變。」

善財白言：「聖者！如是五時，因何而起？」普眼告言：「善男子！時無自體，分別所成，隨妄業輪循環無際。如人睡覺，則名初時，從初剎那，及怛剎那；次名臘縛牟呼栗多，晝夜年劫，時多差別，或約一歲，分為六時，所謂：春時、熱時、雨時、秋時、寒時、雪時。是故智者，知病增損，善達方域所有諸時。謂：春雪時，痰癰病動；於熱雨際，風病發生；於秋寒時，黃熱增長；物集病者，隨時增長。善男子！我今為汝，已說諸病隨時增長，如是身病，從宿食生。若諸眾生，能於飲食，知量知足，量其老少，氣力強弱，時節寒熱，風雨燥濕，身之勞逸，應自審察，無失其宜。能令眾病，無因得起。

善男子！我此住處，常有十方一切眾生，諸病苦者，來至我所，而求救療。我以智力，觀其因起，隨病所宜，授與方藥，平等療治，普令除差。復以種種香湯沐浴，上服名衣，瓔珞莊嚴，施諸飲食，及諸財寶，珍玩資具，皆悉與之，咸令充足。然後各為如應說法，令其永斷心病煩惱。所謂：為諸一切貪欲多者，教不淨觀；瞋恚多者，教慈悲觀；愚癡多者，教其分別種種法相；等分行者，為其顯示不淨慈悲，或略中廣殊勝法門。如是隨應斷諸煩惱，為欲令其發菩提心，稱揚一切諸佛功德，為欲令其起大悲心，顯示生死無量苦惱；為欲令其增長功德，讚歎修習無量福智；為欲令其發大誓願，稱讚調伏一切眾生；為欲令其修普賢行，說諸菩薩住一切

剎，於一切劫，修諸行網；為欲令其具佛相好，莊嚴色身，稱揚讚歎檀波羅蜜；為欲令其得佛清淨無垢法身，稱揚讚歎尸波羅蜜；為欲令其得佛功德不思議身，稱揚讚歎忍波羅蜜；為欲令其獲於如來無能勝身，稱揚讚歎勤波羅蜜；為欲令其得佛清淨無與等身，稱揚讚歎禪波羅蜜；為欲令其得佛究竟平等法身，稱揚讚歎般若波羅蜜；為欲令其得佛普現差別色身，稱揚讚歎方便波羅蜜；為欲令其為諸眾生，住一切劫，心無厭倦，稱揚讚歎願波羅蜜；為欲令其普現其身，嚴淨一切諸佛剎土，稱揚讚歎力波羅蜜；為欲令其現清淨身，隨眾生心，悉使歡喜，稱揚讚歎，智波羅蜜；為欲令其，獲於究竟最勝淨妙無染著身，稱揚讚歎，永離一切諸不善法，迴向諸佛一切善法。如是種種，廣以財法施諸眾生，悉滿所願，各令授化，歡喜而去。

善男子！我又善知和合一切諸香要法。所謂：無等香王香，頻頭薩哩多香王香，無能勝香王香，種種覺悟香王香，阿縷拏襪低香王香，隨身所欲出生香王香，隨時堅細梅檀香王香，龍勝堅固梅檀香王香，堅黑沈水香王香，不動諸根香王香。如是等香，悉知出處，功能勢力，及其貴賤調理之法。善男子！我持此香，以為供養，普見諸佛，所願皆滿。所謂：救護一切眾生願，嚴淨一切佛剎願，供養一切如來願。

善男子！我欲供養然此香時，從一一香，出無量香，徧滿十

方一切法界，一切如來道場海中。化為種種香宮殿、香垣牆、香樓閣、香欄楯、香卻敵、香門戶、香牕牖、香半月、香羅網、香形像、香圓光、香嚴具、香光明、香雲雨、香幢、香帳、香旛、香蓋，莊嚴十方一切法界，處處充滿，以為供養。善男子！我唯知此令一切眾生，普見諸佛承事供養歡喜法門。如諸菩薩摩訶薩，如大藥王，若見，若聞，若憶，若念，若同住，若共行，若稱名，若隨喜，皆獲利益，無空過者。若有眾生，暫得值遇，必令消滅一切煩惱，入於佛法，離諸苦蘊。永息一切生死怖畏，到無所畏一切智處，摧壞一切老死大山，安住平等大涅槃城。而我云何能知、能說彼功德行？善男子！於此南方，有一大城，名：多羅幢，彼城有王，名：甘露火。汝詣彼問，菩薩云何學菩薩行，修菩薩道。」時善財童，禮普眼足，繞無數帀，殷勤瞻仰，一心戀慕，辭退而去。

爾時，善財童子，於普徧眼善知識所，聞說菩薩能令眾生，普見諸佛歡喜法門，隨順憶念，心心相續，歡喜踊躍。作是思惟：「善知識者，以善方便能攝受我，以深重心能守護我，令我於阿耨多羅三藐三菩提，得不退轉。」如是專念，生淨信心、欣慶心、怡暢心、調順心、勇進心、寂靜心、廣大心、莊嚴心、無著心、無礙心、得心自在心、常作心、師心、善巧分別心、普生眾行心、隨聞解法心、徧往佛剎心、見佛莊嚴心、恆不離佛心、專求十力心、一向無退心。漸次前

行，經歷國邑，村營聚落，然後乃至多羅幢城，處處尋求，見王方便。

於時遇有多聞、多解諸婆羅門，在於四衢，談論世法。善財往問：「云何得見甘露火王？」時彼多智大婆羅門，問善財言：「仁從何來？何所求請，欲見我王？」白言：「我從藤根國來，普眼長者，教我獲得歡喜法門，令我來此，求見大王，請問菩薩，行菩薩行。」婆羅門言：「彼藤根國，安隱豐樂。仁之色相，德慧莊嚴，捨彼來此，必獲利益。以仁大智，必見我王。仁且安坐，聽我所說。我王恆居寶嚴正殿，坐勝摩尼師子之座，頒行正法，成就眾生。」

善財復言：「何故大王名甘露火？」答言：「我王具足七支，行中道化，治罰惡人，銷其過犯，猶如烈火；安攝善人，與其快樂，譬如甘露。以是慈悲，平等教化，增其壽命，心無厭足。故我國人，美王盛德，歌讚王猷，咸稱我王為甘露火。我王復以種種方便，調御眾生，決其諍訟，撫其孤弱，卹其惇獨，遂其勝行，皆令永斷十不善業，正修十善，如轉輪王所行之法。」

善財復言：「云何名為具足七支，行中道化？」答言：「審聽！當為宣說。言七支者：一有君德，天下仰戴，如人之首；二有輔臣，左右忠良，如人之臂；三有國境，寬富包容，

如人之腹；四有險固，囊結萬方，如人之齋；五有倉庫，財食充盈，所往無難，如人之脞；六有兵威，士馬精銳，制動由己，如人之脛；七有鄰境，貢賦以時，往復王命，如人之足。復有二法，能持七支：一謂：威勇；二謂：智謀。二德相資，如人目足；七支依住，正教施行，所向皆從，靡不流布。如山出雲，如地持物，澤潤卉木，德被黔黎，由是四海，皆遵聖化。支德互闕，如車隻輪，如鳥一翼，決定不能翔空致遠。我王咸具，名稱普聞。仁復當知，我國大王，成就九法，能轉王輪。何等為九？一、德伏四鄰，自修職貢；二、貢賦不入，恩信感之；三、感之不從，說其君臣，令相疑阻；四、彼或革心，君臣異議，說使和同，令歸聖化；五、善說不聽，王師討伐；六、觀彼主率，將德有無；七、審其寡德，議其城守；八、知彼牢城，料兵強弱；九、自揣國中，人和兵銳。我國大王，具此九法，慧眼常明，照瞻一切。是故八表，咸歸正化，自求臣屬，永不退還。譬如眾流，朝宗於海，皆同一味，無有異心。仁者當知，我國大王，奉事多佛，是大菩薩，具大慈悲，應現人間，覆育群品，知諸眾生，應漸調伏，先宣王法，漬潤其身，究竟令其心得解脫。是故我王，有二聖德。何等為二？一者內德，種族真正，仁慧深遠；二者外德，如上略明，後當廣說。

善財白言：「云何內德？願為說之。」答言：「仁者！我國大王，種族尊勝，嫡嗣承襲，歷代相傳，入胎處胎，諸天護

念。出胎已後，乃至受位，福慶交至，萬國歡娛。聖德日躋，博聞強記；仁智孝友，恭慈惠和；聽視聰明，具諸慚愧；有具足力，身無眾患；含垢忍辱，心無卒暴；尊賢重德，愍哀庶類；於己財位，恆知止足；於他危難，常思救護；善攝五根，不縱情志；辯才無礙，能師子吼；發言誠諦，離諸愛恚；善解世間，殊音異論；威儀整肅，人咸畏敬；慰諭輔臣，撫育黎庶；憐愍眾生，等心無二；察人詞色，悉知其心；見象馬形，亦知善惡；於有恩德，報復無疲；於怨惡人，善巧將護；行幸城邑，端坐車中，審諦自心，無內外顧；依時出入，以慰國人，有或不順，返逆王命，酷害王民，動作非法，先以善言，如法開示，捨逆從順，王必慈恕，依所領處，不減不奪，亦不驅擯。聞命不悛，當加討罰，剋敵制勝，務在安人。是故我王，善稱遐布。仁者當知，居俗日夜，分為八時。於晝與夕，各四時異，一一時中，又分四分，通計日夜三十二分，以水滿中，定知時分。晝四時者，自鷄鳴後乃至辰前，為第一時；辰初分後至午分初，為第二時；午中分後乃至申前，為第三時；申初分後至日沒前，為第四時。於第一時，日未出前，為初二分；日出已後，乃至朝畢，為後二分，如是四分，名曰：初時。我王精勤，不著眠睡，於夜四時，二時安靜，第三時起，正定其心，受用法樂，第四時中，外思庶類，不想貪瞋。自晝初時，先嚼楊枝，乃至祠祭，凡有十位。何者為十？一、嚼楊枝，二、淨沐浴，三、御新衣，四、塗妙香，五、冠珠鬘，六、油塗足，七、擐革

屣，八、持傘蓋，九、嚴侍從，十、修祠祭。」

善財問言：「云何大王，每自晨朝，要嚼齒木，乃至祠祭，然後臨朝？」答言：「仁者！世界增長，要因於王；王欲理人，先自理身；以身安故，心意和平，神清體和，布化無爽。是故我王，先嚼楊枝，乃至祠祭。又此十事，一一能生十種功德。」

初嚼楊枝具功德者：一、銷宿食，二、除痰癢，三、解眾毒，四、去齒垢，五、發口香，六、能明目，七、澤潤咽喉，八、脣無皴裂，九、增益聲氣，十、食不爽味。晨朝食後，皆嚼楊枝。諸苦辛物，以為齒木，細心用之，具如是德。

復次我王，香水沐浴，具十功德：一、能除風，二、去魑魅，三、精氣充實，四、增益壽命，五、解諸勞乏，六、身體柔軟，七、淨除垢穢，八、長養氣力，九、令人瞻勇，十、善去煩熱。

復次，我王御新淨衣，具十功德：一、增長吉祥，二、行步適悅，三、眷屬愛敬，四、處眾無畏，五、安樂身心，六、能益壽命，七、淨無塵垢，八、名稱遠聞，九、賢聖護念，十、一切讚歎。

復次，我王塗諸妙香，具十功德：一、增益精氣，二、令身芳潔，三、調適溫涼，四、長其壽命，五、顏色光盛，六、心神悅樂，七、耳目精明，八、令人強壯，九、瞻觀愛敬，十、具大威德。

復次，我王冠妙珠鬘，具十功德：一、勝福日增，二、殊珍自至，三、顏色充悅，四、辯才清暢，五、具足吉祥，六、身心無惱，七、吉慶恆集，八、益其壽命，九、具大瞻勇，十、奉觀歡喜。

復次，我王足塗香油，具十功德：一、能除風疾，二、身心輕利，三、耳目聰明，四、增益精氣，五、念無忘失，六、減省昏睡，七、眠夢吉祥，八、延其壽命，九、除諸垢穢，十、不生眾疾。

復次，我王撰妙革屣，有十功德：一、足趺柔軟，二、身觸輕安，三、行步有力，四、益其精氣，五、舉止安詳，六、增長壽命，七、威儀整肅，八、左右歡喜，九、形相端嚴，十、諸臣敬畏。

復次，我王侍衛持蓋，具十功德：一、威嚴尊重，二、顏色鮮明，三、露行去熱，四、不犯風塵，五、能遮雨濕，六、不視無福，七、眾人敬畏，八、身得安寧，九、益壽增氣，

十、清淨光華。

復次，我王莊嚴侍衛，具十功德：一、威儀嚴整，二、令人敬畏，三、增王瞻勇，四、佐王威勢，五、降伏惡人，六、天神自衛，七、禁禦暴獸，八、舒暢王意，九、邪魅不侵，十、行王教令。如是莊嚴，眷屬圍繞，故我大王，如御駕駟，檢察前後，調息自他，寬猛合度，剛柔稱適。如大船主，統領諸船，隨有穿漏，應時補塞。奉侍王人，內宮嫔女，耆德耄齒，監守王宮，妍貌壯年，令其侍衛，或前行導引，燒香散華，吹貝鼓樂，歌詠讚歎，種種莊嚴。或侍從王行，執扇持拂，塗香衣服，眾妙資具，隨時受用，靡不備足，如是導從，以候王心。」

大方廣佛華嚴經普賢行願品卷第十一

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶（三遍）

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國